

IBRANAWU

Wotiya Ibranawu Isaa jaanadëro ruwudëgënadë

Badiduram

Wundu kitawu Ibranawuyea ruwujo bi saa fi ngawo karmo-a karmolan cidu-a Isayen tia ruwujënadëa noniyende, amma ti kam duwon mana Isayea am Isa këlanjua fanjanayen cëmowonadëro noniyena. Bare yaudiya Isaa gawu kambërsenjan casambarënniro, ruwudumadë wotiya adëa ruwuje tayiro Isa Almasiwudë Ala ye, adamgëna ye nangaro, ti runju naptu solomaye katte Ala-a adamgëna-ayen cëdi yeno. Koro Isa jiri fin yaye malaiyawa so, nawiya samma soa ngalworo fëleduro, karwunjaro duno cakke tayiro kambërselan dasaa, wuraja, kalkallo walja yeno.

**Akko nashawa curo wotiya adëyen
dasaanadë:**

Alaye Tadanjuyen mana njëddo (1.1–4.13)

Isama rïman kura martawaa wo (4.14–10.18)

Sëmo kasta-a karwuro duno njo-a (10.19–13.19)

Lewa daryeye (13.20–25)

Wotiya Ibranawu Isaa jaanadëro ruwudëgënadë

ALAYE TADANJUYEN MANA NJËDDO

1 Kuren Ala gənagəniro jiri gadegaden ci nawiyayen kaariyandero mana cəddəna,

2 amma jaman daryeye adən andiro Tadanjuyen mana seddo. Tia warasama awo sammayero kido, koro tiyen duniaa alakkəno.

3 Ti Tadadə yiyildu daraja Alaye, tima camuno kalkal naptunjuyədə wo, koro dunia ngasoa kənduwo mananjuyen roji. Ngawo adamgənəa biwuwalan tayirro kalakcənayen, samən kəmboram Martawamayen napkeno.

Tadadə malaiyawaro kura wo

4 Kaalanju nantadayə warasajənədə cu malaiyawayero ngalwodə gai, tima tayiro kura wo.

5 Malaiyawaye finja gəle Alaye ngalte tiro: «Ni Tədani, ku Bawanəmbo walləkkəna,»† cəne wuljuwo, bi kəlanjun: «Wudə Bawanjuro walləkki, ti ye Tədaniro walji,»† cəne wuljo?

6 Koro walde sa karunju duniaro cuwudidən tiye: «Malaiyawa samma tiro ambəccaa!»†

7 Koro kəla malaiyawadəyən tiye: «Malaiyawanjua ruhuwaro cədi, kidawunju yea təlam kannuyero cədi,»†

8 amma kəla Tadadəyən tiye: «Ala, kurisnəm kərmaiyə sawisoro dəgai, koro kanəm kərmaiyədə tima nanjire wo.

9 Nanjire raamma, jirenambu wanəmma. Adəma nangaro Ala Alanəmdə nia kəndawu karwukəjiyen amanəmbea kojənaro samngeno.»†*

† 1:5 1.5 Jaw 2.7 † 1:5 1.5 2Sam 7.14 † 1:6 1.6 SK 32.43

† 1:7 1.7 Jaw 104.4 † 1:9 1.8-9 Jaw 45.6-7 * 1:9 1.9 kəndawu karwukəjiyen samngeno - Jamannjan kamba kərenəme mairo galaduro, kəndawu jaitunne kəlanjuro fijagane samgeyera.

¹⁰ Koro tiye: «Nidə, Kəmande, badiduramnin fərdu duniaye gənayem, koro samedə ye kida mukkonəmbe.

¹¹ Tayidə sidagai, amma nidə dəgami. Tayi samma kajəmu gai dinjai,

¹² barmus gai tayia kərinəmi, gəməje gai faldai, amma nidə faldəmbaworo dəgami, koro kawunəm ye dajiwawo.»†

¹³ Koro malaiyawaye finja gəle Alaye ngalte tiro: «Namme kəmborammilan duwon, kəladowanəmba si gənaduramməmbo dikki!»† cəne wuluwo?

¹⁴ Tayi samma wolodiya ruhuye am duwon njəkkawo warasajaidəro kida njəddoro juwaada, gəna?

2

Njəkkawo kura

¹ Adə nangaro awo fanniyenaro ngəlaro han-gal gənaniyo, bare sərniyendero.

² To, mana malaiyawayen wuldənadə kibbu yedə, koro biwu so, ganambu so samma wowom-nja jussənədə kəlanjaro gərjaana yedə,

³ andi njəkkawo kuradəa waniyea, ndayin gəle kadiye? Njəkkawo adə, Kəmadə burwon tia ma-wojəna, am fanjanadə ye andiro tabbansaana,

⁴ koro Ala kəlanju ye alama so, awo əjabba so, kənduwo jiri jiri so, kənjowa Ruhunjuye rawonjun dagardəna soyen tia shedajəna.

Fuwuma njəkkawo kura adəye

† 1:12 1.10-12 Jaw 102.25-27 † 1:13 1.13 Jaw 110.1

⁵ Leira kəlanjun mananiyedə, cidiya si malaiyawayero gəni Ala tia kekko,

⁶ amma kam laaye na laan shedaje: «Awi kam duwon tia tangəmidə bi tada kambe tiro kiskəmidə?

⁷ Tia sa ganaro cidiya malaiyawayero kisagəm, tiro ariawu daraja-a martawa-ayea yakkəme

⁸ awo sammaa cidiya sinjuyero kekkəm.»† Awo sammaa cidiyanjuro njakkodə, Ala awo cidiyanjuro cakkəna falmaa koljənni. Kərmadə awo sammaa cidiyanjun koro yaye ruiyewawo,

⁹ amma Isaa ruiye, kam duwon sa ganaro cidiya malaiyawayero cəsaanadə. Bone kar-moye cana nangaro Ala tiro ariawu daraja-a martawa-ayea cakkəna. Ngainin karmonjudə, ser Alayen am samma nangaro nuna.

¹⁰ Ala duwon awo samma ti nangaro ye, tiyen ye dəganadə, tadawa kadaa* darajaro kudoro, fuwuma njəkkawonjayedəa bone njalan kalka-llo dionjudə jussəna.

¹¹ Awoa ti tayirro kalakcidə-a tayi tayirro waljaidə-a samma Bawanja tilo. Adəma nangaro tayia kəramiyalan bowoduro nangujənni,

¹² tiye: «Cunəm kəramiyaniro wulgəkki, dawu jamayen nia njungorəkki,»†

¹³ koro: «Tiro təmani yakkəkki,»† koro walde: «Akkoni tadawa Ala sina-a rokko,»† yeno.

¹⁴ Tadawadə tiyi-a bu-aadə, Isa ye awo anilan nuwanjua. Ngainin karmonjuyen ti duwon

† 2:8 2.6-8 Jaw 8.4-6 * 2:10 2.10 *tadawa kada* - Am duwon Isa Almasiwuyen tadawa Alayero waljanadə. † 2:12 2.12 Jaw 22.22

† 2:13 2.13 Ish 8.17 † 2:13 2.13 Ish 8.18

kənduwo karmoye cədana wotte Yiwulisdə yea baworo cəde

¹⁵ am duwon ridu karmoye nangaro kəndəgainja samman nankarean dasaanadə yero nankam kəlaye cina.

¹⁶ Awoa tabbatto malaiyawaa gəni, kaduwu Nawi Ibrahimbea banajiyi.

¹⁷ Adəma nangaro dole jiri fin yaye kəramiyanjudə-a camunno walji, curo kida Alayen riman kura kanjimarima ye, amanna yero waljo, biwuwa jamadəye cinjoro.

¹⁸ Ti kəlanju jaraptəne bone canadə, nanjun kənduwo tayi jaraptaidəa banaduwaye mbeji.

3

Isadə Nawi Musaro kura wo

¹ Adə nangaro, kəramiya muminna, nayi bowodu sameyen nuwandoadə, Isaa wunowo, tima kəngayam-a riman kura-a njasaraindeyedə wo.

² Nawi Musa curo jama Alaye sammayen amannadə gai, Isa ye ti duwon tia galajənadəro amanna.

³ Fado tandoma fadodəa darajan kojənadə gai, Isa ye Nawi Musaa darajan koduye martawanjua.

⁴ Awoa fado fi yayea kam cədandəna mbeji, amma ti awo sammaa cədandənamadə, tima Ala wo.

⁵ To, Nawi Musadə Alaye wolodi, curo jamanju sammayen amannaro walje naptu shedama awo fuwun wuldidəye kido,

⁶ amma Almasiwudə Alaye Tada, kəla jaman-juyen amanna, koro karwukibbande-a fərdu təmandeye-aa roniyea, andima jamanjudə wo.

Tustu laa jama Alaye

⁷ Adə nangaro, Ruhu Alaye wuljənədə gai: «Ku kowonju fannuwia,

⁸ bare karwundo janguwwi, jiri turudən yim jaraptuyea karaan cadənədə gai,

⁹ na duwon kaariyando saa fidewuro kəndoni carunason wua rijamsane jaramsanədə.

¹⁰ Adə nangaro am jaman tiloa todəro gərgagəkke wuye: “Kullum karwunjan faccagai, jawalnidəa nojanni.”

¹¹ Daji gərgadunin kansı bukke: “Tustunidəro ngasayiwawo!” yekko.»†

¹² Kəramiya, hangal gənanowo bare kamndo laa karwu diwi-a kambərsenambu-aaro walje Ala Kəndəgaimaa koljənni.

¹³ Yim tiro ku canison kattendon dunoadənowo, bare jamba biwuye wundundomaa cakke karwunju jakcənni.

¹⁴ Təmande burwoyedəa har njerorambo ngəlaro roniyenaa, na Almasiwuyen nuwande.

¹⁵ Wuldənədə gai: «Ku kowonju fannuwia, bare karwundo janguwwi, jiri turudən cadənədə gai.»†

¹⁶ Wunduso kowonju fanjanason turu kedo? Tayi mukko Nawi Musayen Masarlan caluwuna samma, gəna?

† 3:11 3.7-11 Jaw 95.7-11 † 3:15 3.15 Jaw 95.7-8

17 Wundusoro Ala saa fidewuro gərgajəgənədə? Tayi biwu cade kaminnja karaan casurənədə, gəna?

18 Koro tayi ganambu cadəna gənia, wundusoro Ala tayi tustunjuro ngasayiwaworo kansijəbbunədə?

19 To, kambərsenambudəro rakcane ngasaan-niro ruiyena.

4

1 Adə nangaro, kua yaye wadu tustunjuro ngawoye mbejidə, hangal gənaniyo bare kamndo laa tia fuccənniro.

2 Awoa kawuři kəjidəa tayiro wuljaanədə gai, andi yero wulsaana, amma mana kawuřidəye tayiro faidajəgənni, tayidə kambərselan am fanjanadəro kəldaganni nangaro.

3 Andi kasaddiyenədə tustudəro ngayiye, kəlanjun wuljənədə gai: «Gərgadunin kansibukke: “Tustunidəro ngasayiwawo!” yekko.»† Adəson, kidawanju kawu dunia alaktənaman ceserəna.

4 Kitawuye na laan kəla kawu tulurdəyen ngai wuljəna: «Kawu tulurredən Ala kidanju samman tuskeno.»†

5 Koro walde na adə yen: «Tustunidəro ngasayiwawo!»† cənnə.

6 Adə nangaro, am laaye tustudəro ngawo gapcənədə, koro am burwon tayiro kawuři kəji wuljaanədə ganambu nangaro tustudəro ngasaannidə,

† 4:3 4.3 Jaw 95.11 † 4:4 4.4 Bad 2.2 † 4:5 4.5 Jaw 95.11

⁷ jauru tussənaye ngawon Ala koro walde kawu laa tiro ku cani dabbarje ci Nawi Daudayen tiye: «Ku kowonju fannuwia, bare karwundo janguwwi,»[†] cənna, calan wulliyenadə gai.

⁸ Ca Yoshuwa tayiro tustu cinaa, ngawon Ala mana kəla kawu gadeyen cədənni.

⁹ Adə nangaro jama Alayero yim tustuye gapcəna mbeji.

¹⁰ Kam tustudəro ngaanadə, Ala kidanjun tussənadə gai, ti ye kidanjun tussəna.

¹¹ Adə nangaro tustu adəro ngaworo kowori diyo, bare wunduma ganambu kaanja-a camun nangaro yessənni.

¹² Nonowo, mana Alayedə roa ye, faidaa ye, kashagar təlām yindia fi yayero timia wo, tidə ro-a ruhu-a koro ndəwu-a buri-a yaktama, koro təma-a nia-a karwuye sharama.

¹³ Alau fima fuwu Alayen gəraada bawo, amma awiso farakko kaada curui, ti duwon andia kəndonde sammaro saworidə.

ISAMA RIMAN KURA MARTAWAA WO

¹⁴ Adə nangaro, rima kura martawaa sameyen reje kojənaa taiyenadə, wotte Isa Tada Alayedə, njasaraindedəa roniyoi!

¹⁵ Awoa rima kura nanlawunden rakce andia njunosaiwawo gəni taiye, ai, jiri fin yaye andi gai jaraptəna, amma biwu cədənni.

¹⁶ To, kuris Ala Sermayedəa ridu bawoaro karənniyo, kanjimari ye fandiyo, ser sa jəktuyen bana kudoma ye moyiyo.

[†] 4:7 4.7 Jaw 95.7-8

5

¹ Riman kura fi yaye dawu amben kareyadada jama nangaro kela awowa Alayen galaada, sadaa so, bu fida biwuwa nangaro so cadi.

² Koro rakce nodunambuwa-a am jawalan caluwuna-aro kissiyi, ti kulanju nanlawun daganadaro.

³ Ada nangaro, biwuwa jamayero bu fida cadida gai, kaanju yero dio tiro wajipcagana.

⁴ Wunduma kulanjuro daraja ada ngojiyiwawo, sai Ala tia bowojiya, Nawi Harunaa bowojenada gai.

⁵ Jiri adagainin Almasiwuda daraja riman kuraro walduye kulanjuro ngojaganni, amma ti duwon tiro: «Ni Tadani, ku Bawanambo wallakkana,»† cennada

⁶ na gaden tiro: «Ni riman har abadaro, kaala Malkisadakayen,»† wuljena.

⁷ Naptunju duniyen Isa kowo dunoa-a simalooa moduwalan ti duwon nanjun kenduwo tia karmolan njekkawoyeada lowoji, koro nanmuminnjudaro Ala tia fangeno.

⁸ Ti Tada Alaye yaye, bone njanjuyen ga kiro.

⁹ Naptu kalkalda nayeyenniya, am tia jaana sammaro fardu njekkawo sawisoyero walyeno,

¹⁰ koro Ala tia riman kuraro kaala Malkisadakayen galayeno.

Samo kasta kela jawal kolduyen

¹¹ Kela adayen awo wulduye ngawu taiyena, amma bayindunjudu jau, nayida fanduro lusurro walluwwadaro.

† 5:5 5.5 Jaw 2.7 † 5:6 5.6 Jaw 110.4

¹² Tussəna maləmbaro waldu nayiro wajimn-jaanason, nayiro alamdu budu mana Alayedəa nangadembo njikkəralan məradundoa. Kəmbo kibbulan gəni, kiamlan məradundoa.

¹³ Wundu duwon kiamlan dəganadə mana nanjireye asujiwawo, ti tadaana nangaro.

¹⁴ Amma kəmbo kibbudə am wurajanaye, tayi duwon hangalnjan kullum faidadane halnja awo ngəla-a diwi-a gayirduro alamgadadə.

6

¹ Adə nangaro, alamdu burwoye Almasi-wuyedəa kolliyo, kəla awo kalkaldəyen fuwuro leniyo. Bare koro yaye fərdu gənaniye kida karmo kudomaa wanəme təmdu so, Alaa mərsadu so,

² alamdu kəla kasala-a mukko gənaduwo-a karmolan cidu-a wowom sawisoye-ayen kəlan mana diyende.

³ Alaye cədia, fuwu buiye.

⁴ Awoa am kəlanja fərəmdə kənjo sameye casambe Ruhu Alayen nuwa cawande

⁵ mana Alaye so, kənduwo dunia fuwuye soa kəjiro casambəna duwon

⁶ jawallan caluwunadə, waldəme tayia təmduro kalaktuwudə yojiwawo, dalilnjudə koro yaye Tada Alayedəa kəskaro jajagane farakko tia nanguro casakki nangaro.

⁷ Awoa cidi duwon ingi ngəwuro tilan cudure cane nema barewunjudəro faidaa cakkidə barga Alaye cuwandi,

⁸ amma kariyi so, kajai so cakkia, faidanju bawo, baskuduro dabbargada, koro daryer-amnin kannu cattai.

⁹ Kɛrawowunde, ngai wulliye yaye, kɛlandon awowa ngalwo mbejiro mɛrsaniyena, wotte awowa njɛkkawoye.

¹⁰ Ala jirenambuma gɛni, kɛndondo so, kida muminnaro yidduwe kɛrawo cunjun fɛlenuwwa ye, kua yaye fɛlenuwi ye soa ngessiwawo.

¹¹ Koro tɛmando har njerorambo tabbacciyyiro wundundo yaye kowori adɛmaa cɛdiya, rayiye.

¹² Bare lawuro walluwwi, amma tayi duwon kambɛrse-a kanadi-ayen wadu Alaye warasa-jaidɛa gaiwo.

Wadu tabbat Alaye

¹³ Sa Ala Nawɪ Ibrahimbo wadu ngojɛgɛnadɛn, wunduma tia kojɛna kɛlanjun kansɪ boye bawodɛro, kɛlanjun kansɪ jɛbbuwe:

¹⁴ «Tabbatto barga dɛmnjɛgɛkke kaduwunɛm isangɛwugɛkki,»† yeno.

¹⁵ Adɛgaima Nawɪ Ibrahim kanadin gurejɛnaye ngawon, awo Ala tiro waduro ngojɛgɛnadɛa kiwando.

¹⁶ Awoa amso kɛla awo tayia kojɛnaye kansɪ jawui, koro kansɪ tabbatdɛ kambiwunja sammaa baworo cɛdi.

¹⁷ To, Ala nanfaldunambu nianjuyedɛa warasawu wadudɛyero cayemaa kojɛnaro fɛleduwu kiraanniya, kansɪlan tia tabbatkeyeno.

¹⁸ Ngainin kɛla awo yindi faldaiwawoyen, koro kɛlanjan Ala tɛmmaro kattuwu kamjiwawodɛ,

† 6:14 6.14 Bad 22.17

andi duwon gɛraduramdɛro kasiye ngayiyenadɛ
duno kura fandiye tɛma fuwundero cakkɛnadɛa
taiye!

¹⁹ Tɛma adɛa sunu roye gai taiyena. Tidɛ
tabbat ye, dunoa ye, koro ngawo juwadɛyero
ngayi.*

²⁰ Isa ye, ti duwon rima kura sawisoyero
kaala Malkisadakayen waljɛnadɛ, fuwunden leje
andi nangaro nadɛro ngaana.†

7

Kaala nanriman Malkisadakaye

¹ Malkisadaka adɛ, ti mai bɛrni Salambe ye,
riman Ala Mai Samemaye ye, ti duwon Nawi
Ibrahim maiyadɛa kɛriwun juwe waldidɛn tia
kapciye tiro barga dɛpciye,

² koro Nawi Ibrahim tiro jakka awisoyea
cinadɛ, burwon, maana cunjuye mai nanjireye,
koro ti mai Salambe, maananju mai nanlewaye.

³ Tidɛ bawa, bi ya, bi kaariya cɛdanni, badidu-
ram kawuye bi njeroram roye cɛdanni, amma
Tada Alaye-a camunno waljɛna, koro sawisoro
riman dɛgai.

⁴ To, nankura kam adɛyedɛa ruiwo, ti duwon
kaarinde Nawi Ibrahim tiro jakka ganimadɛye
cinadɛ.

⁵ Kɛla Attaurayen tayi kaduwu Lewiye kaala
nanrimanne cawandɛnadɛ wada mukko ja-
mayen jakka mowoye cadana. Jamadɛ Nawi

* **6:19 6:19** ngawo juwadɛyero ngayi - Na jauro darajaa Ala
dɛgaidɛ. † **6:20 6:20** jaw 110.4

Ibrahimben tasambəna, wotte kəramiyanja yaye, mukkonjan jakka camoyi.

⁶ Amma Malkisadaka ti duwon fərdunju tay- ilan bawodə mukko Nawī Ibrahimben jakka cəmoje ti waduwadəa cəmowonadəro barga dəpkeyeno.

⁷ Shekkuma bawo gana kurayen barga cuwandi.

⁸ Kuro laayen am nowu jakka camoyi, amma kuro gadeyen ti roaro shedajanadə jakka cəmoji.

⁹ Koro ngai wulduro, Lewi jakka mowomadə Nawī Ibrahimben jakka biyajəna,

¹⁰ awoa sa Malkisadaka Nawī Ibrahimba kapcəgənayen, tidə koro yaye curo tiyi kaarin- juyen.

¹¹ To, jamadə kaala nanřiman Lewiyen At- tauraa camowona, amma kalkallo waldu tilan isənni. Adə nangaro řiman gade kaala Nawī Harunayen gəni, kaala Malkisadakayen cu- luwilan mərədua.

¹² Nanřimandə faldiya, dole wadadə ye faldi.

¹³ Awoa ti kəlanjun awo ani wuldənadə řiri Lewiye gəni, řiri gadeye, řiri duwon wundun- juma kida laya duwadurambe cədənənidə.

¹⁴ Tabbat Kəmande řiri Yahudayen kiluwo, koro Nawī Musa kəla řimanna řiri adəyen awima wuljənni.

¹⁵ Adə koro cayemaa kojənarə federo walji, řiman gade Malkisadaka-a camun fəlediyiya,

¹⁶ řiman duwon kəla ada kaan kaarinnen gəni, kəla kənduwo ro ceriwawoyen řimanno waljənadə.

17 Awoa sheda adəa kəlanjun cadi: «Ni řiman har abadaro, kaala Malkisadakayen.»†

18 Wada cayedə dunonambunju-a faidanambunju-a nangaro baworo waljəna,

19 awoa wadadə awimaa kalkallo kalakcənni, amma cujunjuro təma ngalwo mbeji, tiyen Alaa karənniye.

20 Koro awo adə kansi bawoalan gəni tədo. Awoa calan amso kansi bawoalan řimannaro waljana,

21 amma Isadə, Alaye tiro: «Kəmande kansi juwuna, koro təmdiwawo: “Ni řiman har abadaro,”»† cəne kansialan tia řimanno kido.

22 Kəla adəyen Isa aman ngalwodəa* tabbac-ciwi.

23 Koro am ngəwu řimanno waljana, karmoye tayia kidanjan kolje dasayiwawo nangaro,

24 amma ti sawisoro dəgai nangaro, nanřiman təmmaro faldiwawo cədana.

25 Adəmaro kənduwo am duwon tiyen Alaa karənjaidəa sawisoro njəkkawoye cədana, dalil-njudə ti sawi yaye tayiro moduwa njəddoro dəgai nangaro.

26 Řiman kura jiri adə gai taiyeya, jussəna: mumin, biwubawoma, tayir, biwuwu-a faidana, samemaro kuruwunno sapcana.

27 Řimanna kura gade gai bu fida yimbi yaye diolan məradunju bawo, burwon biwuwa kəlanjuyero, daji biwuwa jamanjuyero. Adəa sa kəlanju bu fidaro cinadən tilo lonno kido.

† 7:17 7.17 Jaw 110.4 † 7:21 7.21 Jaw 110.4 * 7:22 7.22 aman ngalwo - Aman bəřində.

²⁸ Awoa wadadə am duno bawoa řiman kuraro galaji, amma wadu kansiyə ngawo wadadəyen isənadə Tada har abadaro kalkallo waljənadəa galaji.

8

Isama řiman aman ngalwoye wo

¹ Awo wulliye sammaye asuduram manandeyedə: Řiman kura adə gai samən kəmboram kuris kərmaiye Martawamayen napkadaa taiye,

² wotte kidama na tayir leima jireye kam gəni, Kəmande kokcənadəye.

³ Awoa řiman kura fi yayea sadaa-a bu fida-a corogalajai, adə nangaro ti yero awo njoye fandodə wajipcəgəna.

⁴ Ca ti dunian kərgaa, təmmaro řimanno waljiwawo, řimanna kəla Attaurayen sadaa njowu mbeji nangaro.

⁵ Tayidə kidawu kaudi awowa samən dasaanaye. Ala sa Nawi Musa leimadəa cədandidən səmonju kassənadə gai: «Hangal gənane, awisoa kəla fasalnju kau kuruwun fəlenjəgəkkənadəyen tande!»†

⁶ Amma kərma Isa soloma aman ngalwoye waduwa ngalwoyen tabbaccəgənadəyero waljənadə gai, kida tiro tinadə ye ngalwo.

⁷ Awoa ca aman burwoye* awima tilan maujəna baworo walyenoa, dalil aman kənyindiye laaa maduye bawo.

† 8:5 8.5 NL 25.40 * 8:7 8.7 *aman burwoye* - Aman cayedə.

⁸ Amma Ala jamanjuro ayau gənajiye: «Akko sa cəde, jama Israyilaye-a jama Yahudaye-a aman bərin ndəmmiye,» yeno Kəmandeye,

⁹ «aman duwon kaariyanja-a yim tayia mukkoyen takke lardu Masarren tuluwukkənalān ndəmmiyenadə-a camun gəni. Kəla amanniyen dasaanni nangaro, wu ye tayiro kiskəkkəni,» yeno Kəmandeye.

¹⁰ «Akko aman ngawo yim aniyen jama Israyilaye-a ndəmmiyedə,» yeno Kəmandeye, «wadawani hangalnjarō yakkəkki, karwunja yen ruwunəkki. Alanjaro walləkki, tayi ye jamaniro waljai.

¹¹ Wunduma kamanjuro bi kəraminjuro “Kəmandea none!” cəne alamjiwawo, gananja tamiya kuraro kudero tayi samma wua nosai nangaro.

¹² Jirenambunja njunonəkki, biwuwanja ye gadero tangəkkiwawo,»[†] yeno.

¹³ Aman bərin wuldunjudə, burwoyedəa dinaro kalakcəna. Koro awo duwon dina ye, sanju kojəna yedə, baworo waldunju karənjəna.

9

Na darajaa cidiye-a sameye-a

¹ Aman burwoyedən wadawa Alaro ambəttuwuye-a na darajaa cidiye-a mbeji.

² Awoa leima ketando, curo ngimnju burwoye tiro na darajaa canidəyen fatəladə-a tewurdə-a burodi sadaayedə-a mbeji.

[†] 8:12 8.8-12 Iri 31.31-34

³ Ngawo juwa kənyindiyedən ngim kənyindiye tiro na jauro darajaa canı mbeji,

⁴ nadən kaaji njakkoram dinarredə-a sanduwu amanne tiyinju samma dinarlan jakkadadə-a mbeji. Curo sanduwudəyen kalwo dinarre curon kəmbo tiro man* canidəa-a ka Nawi Harunaye fəre cakkənadə-a allowa amandəyedə-a mbeji,

⁵ samenju yen malaiyawa daraja Alaye na gərgadunju fastuyedəa kaudi fefedonjayen jakcai mbeji. Kərmadəro dama mana ani sammaa fal fallo bayinduye bawo.

⁶ Awo ani ngai dabbargadadə, řimanna nasha burwoyedəro kullum ngasaye kidanja cadi,

⁷ amma nasha kənyindiyedəro řiman kura runju saan fallo ngayi, koro bu bawoa ngayiwawo, bu duwon kəlanju-a biwuwa jamaye nodunambunjan cadəna-a nangaro cuwudidə.

⁸ Ruhı Alaye ngainin sa leima burwoye kua yaye mbejidə, jawal na jauro darajaayedə koro yaye isanodənniro farakko fəleyeno.

⁹ Adə misal jaman kuyero, awoa sadaa-a bu fida-aa řimanna cadidə rakcane karwu ambəttuwumayedəa kalkallo kalakcawawo.

¹⁰ Tayidə wadawa tiyiye, kəmbo-a kənja-a kasala jiri jiri-aa wujana, har awo samma bəřinno waljiro gənaada.

¹¹ Amma Almasiwu fəledəgəna, wotte řiman kura awo ngəla ngəla isanaye. Curo leima duwon mukkon gəni tədandəna, maananju alaktu adəye gəni, leima burwoyedəro kura-a tayir-a wodəyero koje

* **9:4 9.4** *man* - Kəmbo samelan isənadə.

¹² tilo lonno na jauro darajaadəro ngaye bu dal so, kənna soyen gəni, bunjuyen merudu sawisoye kimowo.

¹³ Ai, bu dal so, dalo soye-a buwu kənna karwudi wargadaye kəla tayirnambuwuyen jəjərgadaa-a tiyi kambe tayir gənədəa tayirro kalakcairo walyenoa,

¹⁴ balle bu Almasiwuye, ti duwon Ruhu sawisoyen awima waada bawoan Alaro kəlanju cinadə, karwundea kida karmo kudoman tulji, ngainin andi ye Ala Kəndəgaimaro kida yiddiye.

¹⁵ Adə nangaro Almasiwudəma soloma aman bərinne wo. Am bowowadadə wadu warasa sawisoyea cawandi, dalilnjudə karmonju tayia biwuwa duwon kəla aman burwoyen cadənədəlan merujəna nangaro.

¹⁶ Lamar aman warasayedə, sai aman diomadə bawojənarə tabbattiyi ya duwon,

¹⁷ aman warasayedə karmo bawoa, kənduwonju bawo, dalilnjudə aman diomadə ronjuamaa aman warasayedə dunonju bawo nangaro.

¹⁸ Adə nangaro aman burwoyedəma bu bawoan ndəptənni.

¹⁹ Nawi Musa, ngawo wada Attauraye fi yayea jama sammaro wuljəgənayen, bu kənna so, dal soye ingi-a wulu kime-a kəska təngəri isop cani-an kundenno ngoje kitawu kəlanju-a jama samma-aro jəjərjiye

²⁰ tayiro: «Bu adə aman duwon Ala nayiro ronoworo wulnjaanadəa tabbacciya,»[†] yeno.

[†] 9:20 9.20 NL 24.8

21 Jiři adəgainin leimadə-a kalwowa ambəttuwuye samma-aro budəa jəjəryeyeno.

22 Kəla Attaurayen awo ngəwua bulan tayirro kalakcai, koro bu fida bawoa, gawara bawo.

Bu fida Almasiwuye

23 Adə nangaro, kaudi awowa samən dasaanayedəa bu fida anilan tayirro kalaktu wajipcənadə, dole awowa sameye kəlanjadə bu fida ania kojanalan tayirro waljai.

24 Awoa Almasiwu na darajaa mukko kamben tədəna, wotte kaudi awo jireyero gəni, amma samedəmaro kərgawo, kərma fuwu Alayen andi nangaro fəleduworo.

25 Koro samero ngawonjudə, kəlanjua ngəwuro bu fidaro njoro gəni kərgawo, jiři riman kura saa fi yaye bu kaanju gənian na darajaaro ngayidə gai.

26 Adəgairo walyenoa, dole tən alaktu duni-ayen sai ngəwuro bone caiya, amma akko tilo lonno njeroram jamannen kəlanjua laya dionju-
lan biwudəa baworo dioro fəledəgəna.

27 Jiři kam fallo nuiro kadargada, koro ngawo adəyen sai sharadə gai,

28 ngainin Almasiwu ye kəlanjua biwu am ngəwuye ngoduro fallo cina, koro fuwun walde kənyindiyeero biwu nangaro gəni, am tia gan-
gadaaro gurejaidəro njəkkawo kudoro fəlediyi.

10

1 Attauradə awo ngəla ngəla fuwun isaidəye camuno jireye gəni, kaudinja bas nangaro,

təmmaro rakce bu fidanju kullum saa fi yaye ca-didəyen am ambəttuwuro karənjaidəa kalkallo kalakciwawo.

² Adə gənia, ca ambəttuwuwudə tilo lonnin tayirro walyeraa, biwuwanja gadero takcannidə, bu fida ania dio koldəna, gəna?

³ Amma bu fida anin saa fi yaye taktu biwuwaye mbeji.

⁴ Awoa bu dalowa-a dalla-ayen biwuwa cindudə təmmaro yojiwawo.

⁵ Adə nangaro duniaro kəndenjun Almasiwuye Alaro: «Bu fida so, sadaa so raammi, amma wuro tiyi dabbarseyem.

⁶ Laya rəməssə wargada bi bu fida biwu nangaro karwunəm cəraanni.

⁷ Daji wuye: “Alani, akko rawonəm dioro kadikko, kitawulan kəlanin ruwuwadadə gai,” yekko.»†

⁸ Tiye: «Bu fida so, sadaa so, laya wargada so, bu fida biwu nangaro so raammi bi ardinəmmi,» wuljənaye ngawon, wotte awo kəla Attaurayen tədida,

⁹ koro walde: «Akko rawonəm dioro kadikko,» cənna. Awo kənyindiyedəa kokturo burwoyedəa cinji.

¹⁰ Koro rawo Alayen andi sadaa tiyi Isa Almasiwuyen tilo lonno tayirro walliyena.

¹¹ Riman fi yaye yim nguson daada kidanju bu fida təmmaro rakcane biwuwa cinjaiwawodəa cədiya cədi,

† 10:7 10.5-7 Jaw 40.6-8

¹² amma Almasiwudə, ngawo bu fida biwuwa nangaro tilo lonno har abadaro cədənayen, kəmboram Alayen napkeno,

¹³ koro kua adən fuwun kəladowanjua si gənaduramnjuro cadiro gureji.

¹⁴ Awoa sadaa falnin am tayirro waljaidəa sawisoro kalkallo cədəna.

¹⁵ Ruhu Alayedə ye andiro kəla adəyen sheda saddi. Tiye:

¹⁶ «Akko aman ngawo yim aniyen tayi-a ndəmmiyedə, yeno Kəmandeye, wadawani karwunjaro yakkəkki, hangalnja yen ruwunəkki,»† wuljənyaye ngawon,

¹⁷ koro walde: «Biwuwanja-a nandiwinja-aa gadero tangəkkiwawo.»†

¹⁸ Gawara aniye tədənədə, sadaa biwu nangaro gadero tədiwawo.

SĚMO KASTA-A KARWURO DUNO NJO-A

¹⁹ To, kəramiya, bu Isayen jawal duwon ridu bawoaro na jauro darajaaro ngawoyedəa fandiyena,

²⁰ wotte jawal bərin ro fandoye juwayen maananju tiyinjuyen andiro fərəmsaana,

²¹ koro řiman kura fuwuma jama Alaye yea taiyena.

²² Adə nangaro karwu tiloan, kambərse tartippan, karwu ye bulan jəjərojane hal diwin tayirdənalalan, tiyi ye ingi tayir tuljənalalan karənniyo!

† 10:16 10:16 Iri 31.33 † 10:17 10:17 Iri 31.34

²³ Ti wadu ngojənadə amannadəro, njasarai təmandeyedəa dunoaro taiyo,

²⁴ koro kattendero kissiyiyo, kərawo-a kida ngəla ngəla-a dioro koworiniyo!

²⁵ Bare ada am laaye gairo captundedəa kol-liyende, amma kattendero duno yiyo, masam-manno yimdə* karəndu cədi ruwidəro.

²⁶ Awoa nodu jiredəyeyə fandiyena ngawon rawonden biwu diyeyə, bu fida biwuwa nangaro gadero bawo,

²⁷ sai wowom jauro riduye ye, kannu jau kələdowa Alayeyə juwui ye guredu.

²⁸ Kam Attaura Nawi Musayeyə wajənamadə kəla mana shedama yindi bi yakkuyen kanjimari cuwandənnin nui.

²⁹ To, kam Tada Alayeyə ruje bu amanne tiyen tayirro waljənadəa tayir gəniro ngoje Ruhū serredəa rajənamadə, wowom jiri fi todəa nandiwīn kojəna tiro gənajagaiya jussənaro təmanuw?

³⁰ Awoa ti duwon: «Wowom gənaduwwudə kakke, wuma rəmbəkki,»† koro: «Kəmande jamanjua sharaji,»† cənnadəa noniyena.

³¹ Mukko Ala Kəndəgaimayero ngawodə awo jauro riduye.

³² Jaman caye, sa duwon ngawo karwundo wassənayen bone yawe lawala kuralan ned-duwwadəa tangowo,

³³ sa laan fuwu jamayen curo rudu-a basari-ayen dəgawwa, sa laan koro am tayiro adəgai caddənaro kəldəgəwwa.

* **10:25 10:25** *yimdə* - Kiyama. † **10:30 10:30** SK 32.35 † **10:30 10:30** SK 32.36

³⁴ Awoa kosowua njunonuwwa, kændando mowo ye karwukəjialan kasadduwwa, nayi kəlando kənda tia kojəna ye, sawisoro tussi ye tawwadəa nonuwwa nangaro.

³⁵ To, adə nangaro bare tabbattuwendodəa kolluwwi, tin mukowa jauru fanduwī.

³⁶ Nettulan məradundoa, ngainin, awo Ala cəraanadəa diwwaye ngawon, awo waduro ngojənadəa fanduwī.

³⁷ «Gana jəm cədiya, ti fuwun isimadə tussiwawo isi.

³⁸ Koro jiremanidə kambərseyen roa dəgai, amma ngaworo waldia, roni kəjinju fanjiwawo.»†

³⁹ Andidə tayi ngaworo waldane faccagaidəye gəni, tayi kambərselan njəkkawo cawandidəye.

11

Kambərse

¹ Kambərsedə, tima awo təmadənadəa tabbatto ngodu, awowa taruiwawodəa tartippo kasattu.

² Tilan kaariyande sheda ngəla Alayen cawandəna.

³ Kambərselan andi ye dunia mana Alayen alaktəna, wotte awo turuidə awo turuiwawolan tədənaro asuyeiye.

⁴ Kambərselan Nawi Haabila sadaa duwon Kaabilayedəa kojənəa Alaro kikkudo. Kambərsenju nangaro tia jiremaro ngojane sheda ngəla kiwando, Ala kənjonjudəa

† 10:38 10.37-38 Hab 2.3-4

ardijēnadēro. Koro ti nunama, kambārsenju nangaro koro yaye mana cēdi.*

⁵ Kambārsenju nangaro Nawī Idārīsa bare karmo curunniro tia samero sapkera, daji tuwandēnni, Ala tia sapcēna nangaro. Awoa kawu saptunjudēro, Ala tia ardijēnaro sheda-jana.

⁶ Kambārsē bawoan ardidu Alayea fandodē yojiwawo, awoa kam Alaa karēnjidē dole Ala mbeji ye, maduwunjuro mukowa ci yedēa kasacco.

⁷ Kambārselan Nawī Nuhu sa Ala tiro kēla awowa kua yaye taruiwawoyen gala cinadēn Ala ridalan am fannjuyea njēkkaworo maara dabbaryeno. Ngainin duniaro wowom gēnajiye warasama nanjire duwon kambārselan tuwandidēyero walyeno.

⁸ Kambārselan Nawī Ibrahim, sa Ala tia na warasajidēro leduro bowojēnadēn, Alaa giya, koro na lejimaa nojēnni yaye, leyeno.

⁹ Kambārselan cidi wadudēyelan sikudo gai napkeno, koro curo leimawayen Isaku-a Yakuba-a rokko warasawu wadu faldēyeman kasarga,

¹⁰ awoa bērni fērdūa duwon kurdumanju-a tandomanju-a Ala wodēa karwunju gureji.

¹¹ Kambārselan Saratu kēlanju, ti duwon cambiwawo ye, jaurō kēmurjojēna yedē, kaduwu cuwandiro walyeno, dalilnjudē ti wadu ngojēnadēa amannaro ngojēna nangaro.

¹² Adē nangaro kam fallen, ti koro nuna gai,

* **11:4 11.4** *kambārsenju nangaro koro yaye mana cēdi* - Nawī Haabila nuna yaye, kambārseyen awo Ala cēraanadēa cēde sheda ngēla na Alayen kiwando. Ngainin shedanju mana saddi.

kaduwu sillowuwa sameye ngəwu gai, koro sim cidi kesa ci tekuyen komdiwawo gai kesambo.

¹³ Am ani samma awo wadudəye cawandənnin kambərsenjaa sanuna, amma awodəa kuruwuyen carune kəji fanjana ye, tayi kəlanja dunian kusotto-a sikudo-aro kasaccana ye.

¹⁴ Awoa am ngai manajaidə lardu gade kaanja majairo fəlejai.

¹⁵ Lardu koljanadəa takcairo walyenoa, ca dama walduye cawandəna,

¹⁶ amma cuju adəyero lardu ngalwo, wotte sameyero karwunja casakkəna. Adə nangaro Aladə tia Alanjalan bowojaidəa nangujiwawo, awoa tayiro bəрни laa dabbarjəgəna.

¹⁷ Kambərselan Nawī Ibrahim, sa Ala tia jara-pcənadən, Isakua bu fidaro kaino. Ti wadudəa cuwandənadə tadanju tok tilodəa cina,

¹⁸ ti duwon kəlanjun Alaye: «Am Isakuyen tasambidəmaa kaduwunəmlan bowojai,»[†] cənnadə.

¹⁹ Ibrahimdə na Alayen kənduwo am karmo-laman sangoye mbejiro təmayeno, koro misal gainin tadanjudəa ngainin kiwando.

²⁰ Kambərselan Isaku Yakuba-a Yesawu-aro kəla awowa fuwun isaiyen barga dəpkeyeno.

²¹ Kambərselan Yakuba sa no cədidən ci kanjuyero njutkadaan Alaro ambəcciye tada Isuwuye fi yayero barga dəpkeyeno.

²² Kambərselan Isuwu kawunju njero cədidən kəla luwo Israyilawuyen jandeje wada kəla sillawanjuyen kaino.

[†] 11:18 11:18 Bad 21.12

²³ Kambørselan, sa Nawi Musa tambənadən, yanju-a bawanju-a tia shawaro carune wada maiyedəa rijannin kəndawu yakkuro tia gərayera.

²⁴ Kambørselan Nawi Musa sa wurajənadən tia tada fero Fira'aunayelan bowojaidəa waje

²⁵ kəji fanda biwuye tussiwawo yayero jama Alaye-a rokko bone nja kəreyeno.

²⁶ Simnju mukowadəro fijəgəna nangaro, rudu duwon kəla Almasiwuyen canadəa arsiyi Masarero tamanna woro ngoyeno.

²⁷ Kambørselan gərgadu maiye rijənnin Masarnin kiluwo, koro ti turuiwawodəa curuna gairo dunoaro dayeno.

²⁸ Kambørselan sala Burodi Yis bawoadə-a bu jəjərdadə-a kido, bare siduwuma tadawa karunjadəa lejənniro.

²⁹ Kambørselan jamadə Bərəm Maliyayedəa cidi ngamdu gai rejane koyera, amma Masarwu ngai dio mayeranniya, tayia ingi giwo.

³⁰ Kambərse nangaro jamadə kawu tulurro bərni Jerikoyea dirijanaye ngawon, garu Jerikoyedə wurgada.

³¹ Kambørselan Rahab jawardə sisiduwudəa kəlewan kapcəgəna, ganambuwa-a rokko sidəgənni.

³² To, awi koro wulləkki? Ca mana kəla Gidiyon, Barak, Samson, Japta, Mai Dauda, Samaila, nawiya soyen dikkənaa, dama fandəkkiwawo.

³³ Kambørselan tayidə larduwa kəriwun gewo, shara kamgera, waduwa kewando, ci ngambayea jakkera,

³⁴ kənduwo kannuyea samgeyera, timi kashagarrero kayera, dunonambunjan dunoaro walyera, kəriwun nankwa kedo, kəwuwa kəriwuye larduwa gadeyea duyera.

³⁵ Kamuwa amnja sanuna karmolan roaro cijanadəa tayiro kalakkera. Am laa ajawu kura kesa, karmolan cija ro ngalwo cawandoro afu fando wayera.

³⁶ Laa yero rudu fəlejagane kirwon jajaryera, koro tayia sargalan tujane kosoro kesakko.

³⁷ Tayiro dongur kauye gəgəpkeyera, tayia yindiro kamgera, kashagarlan roro keyeso, karawi dimiye-a kaniye-a luwadaa fofomgera, lambi-a jəktu-an kasarga, tayia basaryera.

³⁸ Duniadəma tayia roduro tinni, kalangasa so, kau kuruwu so, kul kauye so, bəlaa cidiye solan bambaramgera.

³⁹ Tayi ani samma kambərsenjajen sheda ngəla cawandəna, amma awo Ala tayiro waduro ngojəgənədəa cawandənni,

⁴⁰ Ala andiro awo laa ngalwo dabbarsaana nangaro, ngainin andi bawolan naptu kalkaldəa najagaiwawo.

12

Isa kambərsendeye fərdunju ye, kalkaldu-manju ye

¹ Adə nangaro, shedawu kada kadami andia dirisane kəlsanadə, andi ye takkal samma-a biwu budulan andia sadai-a waniyo, nettulan ngərəm andiro gənasaanadəa diyo,

2 simnde Isa tima kambørsendeye fərdunju ye, kalkaldumanju yedəro figəiyo, ti duwon karwukəji fuwunjun gənaada nangaro kəska karmoyedəa necce nangunjudəa awimaro ngojənnin kəmboram kuris kərmaiye Alayen napcənədə.

Bare təma kolluwwi!

3 Bare yimbaruwe təma kolluwwiro, ti duwon mukko biwuwuyen nankəlodo canadəa tangowo.

4 Məldundo kəla biwuyen koro yaye har bundo fiduro cadənni.

5 Koro mana duno njoma nayiro tadawa gairo njaddənədəa ngessuwwa: «Tadani, bare njərgəro Kəmandeye kəskero ngonəmmi, koro niro njəkkadiya, bare təma kolləmmi.

6 Awoa Kəmande kam cəraanədəa cərgəri, koro kam fi yaye tadanjuro cəmoyidəa kowoji.»†

7 Njərgərodəa neddowo, Ala tadawanju gairo njadai. Tada fi gəle bawanju tia cərgəriwawodə?

8 Njərgəro duwon wundu yaye tilan nuwanjuadə nandon bawoa, nayidə tadawa gəni, ngəriwuwa.

9 Koro bawawande sasambənaye andia cərgərsane tayia bərsəmmyenədə, balle Bawa ruhuwayədəro daunde kolgəiye ro fandiye, gəna?

10 Tayidə andia kawu ganaro jiri ngəlaro caruna gainin cərgərsana, amma Ala faidandəro cərgərsai, nuwande nantayirnjun fandiyyoro.

† 12:6 12.5-6 Kar 3.11-12

¹¹ Njāgaro samma sanjun kēji gēni, kutturo turui, amma ngawo adāyen tayi tilan alam-gadadāye nuwanjadē nanlewa so, nanjire so.

¹² Adē nangaro mukkondo cāmbarēna-a ngurumngurumndo duno bawoa-a dunoaro dewo.[†]

¹³ Koro sindoro jawal cākko yiddowo, ngainin ngurdiyidē jau fanjiwawo, cujunjuro ngaji.

Bare ser Alayea wanuwwi!

¹⁴ Am samma-a naptu nanlewaye dio-a nantayir-a manowo, awoa nantayirdē bawoa, wunduma Kēmandea curuiwawo.

¹⁵ Hangal gēnanowo, bare wundumaro ser Alaye fando tiyerēnni, bare karwukutta fima cije suwolje tilan am kada tayir gēniro waljanni,

¹⁶ bare wunduma kēnjēnama bi tayirnam-buma Yesawu gairo waljēnni, ti duwon masēna tiloro warasanju nankaruye cēladēnadē.

¹⁷ Nonuwwadē gai, darye, sa bargadēa warasaduro mayenniya, tia wayera. Simaloan majima, dama tēmduye cuwandēnni.

¹⁸ Nayidē awo rakce lediro gēni kadiw,* bi kannu jau fit so, duwu cēlēm pēt so, nurnambu so, keyera kura so,

¹⁹ nuktu kangadiye so, kowo manaye so, kowo duwon am fanjane bare tayiro mana tērganniro lowoanadē.

[†] **12:12 12.12** Ish 35.3 * **12:18 12.18** *nayidē awo rakce lediro gēni kadiw* - Kannu, duwu, keyera, kangadi, kowo. Awo riduye ani shedawa aman caye, wotte aman wadaye; NL 19-20 mane. Awo kēji kējidē shedawa aman bērinne, wotte aman serre; aya 22-24 mane.

20 Ai, wowom adəa rakcane mərjanni: «Ləmanma kau kuruwudəa leja, dongur kauye gəgəptalan roro ceyesi,»†

21 koro awo fəledənədə jaumaro riduye, har Nawi Musaye: «Karwukam sədane lolokki,»† yeno.

22 Amma nayidə kau kuruwu Siyonnero, wotte bərnī Ala Kəndəgaimaye, Jerujalem sameyero isuwwa, koro malaiyawa kada kadami-a ngəməri-a

23 cammo jama karuye cunja samelan ruwuwadadə-a Ala alkali am sammaye-a ruhuwa am jirewuye kalkallo kalaktana-a

24 na Isa soloma aman bərinne-a bu jəjərgada duwon bu Haabilayea faidan kojənədə-aro isuwwa.†

25 Hangal gənanowo, ti mana cədidəa bare wanuwwi. Tayi duwon ti dunian səmonja kassənamaa wajanadə kajanni adə, ti samelan səmonde kassənamadəa waniyea, ndayin gəle kaniye?

26 Sadən kowonju cididəa jəjəkkəno, amma kərma wadu ngoje: «Fallo koro cidi runjumaa gəni, same yea jəjəngəkki,»† cənna.

27 Mana adə: «Fallo koro,» maananjudə awowa jəjəkkadadəa baworo dio, wotte awowa alakkada, ngainin awowa jəjəktaiwawodə dasayi.

† 12:20 12.20 NL 19.12-13 † 12:21 12.21 SK 9.19 † 12:24 12.24 na Isa soloma aman bərinne isuwwa - Kawuri kəjidə isəna nangaro, ridu gadəro bawo. † 12:26 12.26 Hag 2.6

²⁸ Adə nangaro, kərmai jəjəktiawo fandiye-nadə, Alaa wuseniyo, jiri ardijidən jauro darajaa-a ridua-alan tiro ambətkəiyo,

²⁹ «awoa Alandedə kannu juwui-a kal wo.»†

13

Kida na Alayen ardiyada

¹ Kərawo nanyaanayen dəgaiwo.

² Bare kusottowaa sosadu kolluwwi, adəa diolan am laa nojannin malaiyawaa fannjan casaana.

³ Am kosolan dasaanadəa tangowo, nayi ye tayi-a rokko kosolan dəgawwa gairo, koro am basardanadə yea tangowo, nayi ye basari yawwa gairo.

⁴ Larusadəro wundu yaye daraja co, koro bare wunduma aman laruşaye juwunni, Ala janewu-a kənjənawu-aro şara cəddi nangaro.

⁵ Hal kunguna rawoyero kadənowo, kəla awo tawwayen danowo, awoa Ala kəlanjuye: «Təmmaro nia kolnjəkkiwawo, təmmaro nia wanjəkkiwawo,»† yeno.

⁶ Adə nangaro ridu bawoaro andiye: «Kəmandedə tima banamani wo, awima rikkiwawo. Kamdə awi wuro səddi?»† niye.

⁷ Fuwuwundo nayiro mana Alaye wuln-jaanadəa tangowo. Njeroram naptunjaye wunowo, kambərsenja gaiwo.

⁸ Isa Almasiwudə bikka ye, ku ye, har abadaro faldiwawo.

† 12:29 12.29 SK 4.24 † 13:5 13.5 SK 31.6 † 13:6 13.6 Jaw 118.6-7

⁹ Bare kolluwe alamdu gade jiri jiri nayia jawallan njattuluwunni. Karwudə kəmbo bosolan gəni, serlan dunoajima ngəla wo. Ai, ada kəmbosoyedə am duwon tayia jagaima-sodəro faidajagaiwawo.

¹⁰ Andidə laya duwaduram taiyena, tayi duwon leima Ala-a tadoramnin kida cadidə amari tia boye cadanni.

¹¹ Ləmanna duwon řiman kura bunja fije na jauro darajaadəro biwu nangaro cuwudidə, danja ngawo bəlayen kannun warjai.

¹² Adə nangaro Isa ye jamadəa bunju kəlanjuyen tayirro kalakturo ngawo bəlayen* bone kiano.

¹³ To, luwiyo tia ngawo bəlayen nagəiyo, rudu canadəa yaiyo.

¹⁴ Awoa dunia adən bərnı har sawisoro dəgai taiyende, amma bərnı fuwun isidəa maniye.

¹⁵ Adə nangaro tiyen Alaro sadaa njungoroye sawisoro yiddiyo, wotte cinden cunju kasaddiyo, tiro daraja yiyo.

¹⁶ Bare nanngəla-a nankəre-a dio kolluwwi, sadaa jiri aniye Ala kəjinja fanji.

¹⁷ Fuwuwundoro dau kolgənowo, tayia gaiwo, am tayia cawori gairo rondo cəriwi. Karwu kəjia cado, njəmjaialan gəni, adə nayiro faidanjagaiwawo nangaro.

¹⁸ Andiro moduwa saddowo. Karwunden sariwu bawoa noniyena, naptunde samman kalkal dio rayiye.

¹⁹ Nayia lowonjakki, duwan nandoro waldəkke isəkkıro moduwa dewo.

* **13:12 13.12** *ngawo bəlayen* - Deya Jerujalemben.

LEWA DARYEYE

²⁰ Ala nanlewaye, ti duwon bu aman saw-isoyen Kəmande Isa Səni Kura dimiyayedəa karmolan cəsangənədə,

²¹ rawonju deworo nayia awo ngəla sammalan dabbarnja, koro andilan awo tiro ardiduye Isa Almasiwuyen cəddo. Tiro har abadaro daraja tio! Amin.

²² Kəramiya, nayia lowonjakki, mana karwuro duno njoye adəa kasaddowo, nayiro kalma ganan ruwunjagakkəna nangaro.

²³ Nonowo, kəraminde Timotia kosolan koljana. Tussənnin isia, ti-a rokko nayia njaruiye.

²⁴ Fuwuwundo samma-a muminna samma-aa lewanowo. Kəramiyande lardu Italiyayedəa nayia lewanjai.

²⁵ Ser Alaye nayi sammalan dəga!

Kanuri Manga NT Translation
Kanuri, Manga: Manga Kanuri Translation (Portions)

copyright © 2018-2024 Wycliffe Bible Translators, Inc.

Language: (Kanuri, Manga)

Contributor: Wycliffe Bible Translators, Inc.

All rights reserved.

2025-05-06

PDF generated using Haiola and XeLaTeX on 6 May 2025 from source files
dated 6 May 2025

c9559a71-f08b-5c68-a545-05813d16a08e